

SAMÞYKKT

um tilraun reynslusveitarfélagsins Reykjanesbæjar í atvinnumálum.

I. KAFLI

Markaðs- og atvinnumálaskrifstofa og markaðs- og atvinnumálanefnd.

1. gr.

Á vegum Reykjanesbæjar er starfrækt markaðs- og atvinnumálaskrifstofa. Hlutverk hennar er að annast þjónustu við atvinnulausa og atvinnulífið með því að aðstoða atvinnulausa við að fá störf og vinnuveitendur við að fá hæfa starfsmenn til vinnu og með því að veita einstaklingum og fyrirtækjum upplýsingar og ráðgjöf um nýsköpun í atvinnulífinu. Skrifstofan annast framkvæmd samþykktu bæjarstjórnar um aðgerðir til þess að fjölga störfum í sveitarfélaginu og samþykktu hennar um úrræði fyrir atvinnulausa.

2. gr.

Bæjarstjórn Reykjanesbæjar skipar til fjögurra ára í senn fimm aðalmenn og fimm varamenn í markaðs- og atvinnumálanefnd.

Nefndin skal hafa umsjón með starfsemi markaðs- og atvinnumálaskrifstofu og gera tillögur til bæjarstjórnar um aðgerðir til þess að fjölga störfum í sveitarfélaginu. Í því felst m.a. að gera tillögur til bæjarstjórnar um hvernig laða megi ný fyrirtæki til þess að hefja rekstur í sveitarfélaginu, hvernig unnt sé að hvetja fyrirtæki í sveitarfélaginu til nýsköpunar og stuðla að eflingu ferðamannaþjónustu. Nefndin skal enn fremur gera tillögur til bæjarstjórnar um úrræði fyrir atvinnulausa, svo sem starfs- og námsúrræði.

Nefndin skal í störfum sínum hafa nán samráð við aðila vinnumarkaðarins og framhaldsskóla í sveitarfélaginu og utan þess eftir því sem tilefni er til.

3. gr.

Af 2. gr. leiðir að markaðs- og atvinnumálanefnd tekur að sér verkefni stjórnarnefndar vinnumiðlunar.

II. KAFLI

Vinnumiðlun.

4. gr.

Markaðs- og atvinnumálaskrifstofa annast skráningu atvinnulausra og vinnumiðlun. Skrifstofan hefur eftirlit með því að sá sem nýtur atvinnuleysisbóta fullnægi þeim skilyrðum laga um atvinnuleysistryggingar að vera atvinnulaus og tilbúinn að taka vinnu sem býðst. Skrifstofan sendir á tveggja vikna fresti, viðkomandi úthlutunarnefnd staðfestingu á því að hinn atvinnulausi fullnægi skilyrðum til að fá greiddar atvinnuleysisbætur (dagpeningavottorð).

5. gr.

Til þess að öðlast bótarétt verður umsækjandi að láta skrá sig á tveggja vikna fresti hjá Markaðs- og atvinnumálaskrifstofu að viðlögðum missi bótaréttar. Geti umsækjandi ekki látið skrá sig vegna veikinda skal hann láta skrá sig næsta dag sem honum er unnt.

Skrái hinn atvinnulausi sig ekki á tilskildum degi skal hann sæta missi bóta í fimm daga, auk þeirra daga sem liðnir eru frá því að hann átti að skrá sig þar til hann skráir sig á ný.

Markaðs- og atvinnumálaskrifstofa sendir úthlutunarnefndum dagpeningavottorð á tveggja vikna fresti miðað við skráningu.

6. gr.

Svo fljótt sem unnt er eftir að maður lætur skrá sig sem atvinnulausan skulu starfsmaður Markaðs- og atvinnumálaskrifstofu og hinn atvinnulausi gera í sameiningu starfsleitaráætlun þar sem fram komi hvernig hinn atvinnulausi ætli sér að vinna að því að fá vinnu og hvaða aðstoð og úrræði Markaðs- og atvinnumálaskrifstofu honum skuli standa til boða þar til því marki er náð. Áætlunin skal miðast við persónulegar forsendur hins atvinnulausa en einnig taka mið af framboði á atvinnu og atvinnuhorfum í landinu. Afrit starfsleitaráætlunar skal sent úthlutunarnefnd og Vinnumálaskrifstofu félagsmálaráðuneytisins. Starfsmaður skrifstofunnar og hinn atvinnulausi skulu í sameiningu og a.m.k. á þriggja mánaða fresti fara yfir hvernig gengur að vinna að markmiðum starfsleitaráætlunar og endurskoða hana eftir því sem tilefni er til.

7. gr.

Markmið starfs- og námsúrræða á vegum Markaðs- og atvinnumálaskrifstofu eru að auka starfsgetu og starfsmöguleika hins atvinnulausa. Val á því hverjum skuli bjóða úrræði, hvers konar úrræði og í hve langan tíma byggist á mati skrifstofunnar í hverju tilviki fyrir sig á þörf hins atvinnulausa fyrir slík úrræði og hvaða árangurs megi vænta af þeim. Með náms- og starfsúrræðum í samþykkt þessari er átt við:

1. Úrræði samkvæmt reglum um átaksverkefni á vegum sveitarfélaga. Um réttarstöðu þess sem ráðinn er í slíkt átaksverkefni fer samkvæmt almennum reglum um átaksverkefni á vegum sveitarfélaga.

2. Tilboð til hins atvinnulausa um starfsþjálfun þar sem fræðsla og vinna eru samþætt undir umsjón og eftirliti Markaðs- og atvinnumálaskrifstofu. Forsenda fyrir starfsþjálfun á atvinnuleysisbótum er að hinn atvinnulausi komi til starfa til viðbótar við fastan starfsmannafjölda, eða muni vinna við störf sem ekki væru framkvæmd í launaðri vinnu, og að tryggt sé að starfsþjálfun feli ekki í sér röskun á samkeppnisstöðu fyrirtækja. Það er enn fremur forsenda að ekki hafi reynst unnt að ráða menn í slíka starfsþjálfun á almennum launakjörum samkvæmt reglum um átaksverkefni á vegum sveitarfélaga.

Hámarkstími sem maður getur notið úrræða skv. 2. lið er sex mánuðir og a.m.k. sex mánuðir skulu líða á milli þess sem maður getur tekið þátt í slíkum úrræðum. Sá sem tekur þátt í úrræðum samkvæmt þessum liðum er undanþeginn skráningarskyldu en skal í þess stað á fjögurra vikna fresti framvísa staðfestingu á þátttöku í þeim. Verði misbrestur á því glatar viðkomandi samkvæmt ákvörðun Markaðs- og atvinnumálaskrifstofu rétti sínum til starfs- og námsúrræða. Ákvörðun skrifstofunnar þar að lútandi er unnt að skjóta til Vinnumálaskrifstofu félagsmálaráðuneytisins.

Þátttaka í náms- og starfsúrræðum á vegum skrifstofunnar hefur áhrif til skerðingar á 16 vikna biðtíma samkvæmt almennum reglum.

8. gr.

Ákvæði 5.-7. gr. eiga ekki við um þá sem fengið hafa tímabundið leyfi hjá þeirri vinnumiðlun, þar sem þeir eru skráðir atvinnulausir, til að skrá sig reglulega hjá Markaðs- og atvinnumálaskrifstofu.

III. KAFLI

Eftirlit og mat á árangri tilraunar.

9. gr.

Markaðs- og atvinnumálaskrifstofa heldur saman upplýsingum um framkvæmd samþykktar þessarar. Vinnumálaskrifstofa félagsmálaráðuneytisins fylgist með framkvæmd starfsleitaráætlana og náms- og starfsúrræða. Markaðs- og atvinnumálaskrifstofa mun senda Vinnumálaskrifstofu ársfjórðungslega greinargerð þar að lútandi sem Vinnumálaskrifstofa mun kynna fyrir stjórn Atvinnuleysistryggingasjóðs og ráðgjafarnefnd Vinnumálaskrifstofu. Í lok tilraunatímabils munu fulltrúar félagsmálaráðuneytisins og bæjarstjórnar Reykjanesbæjar meta í sameiningu árangur tilraunar. Úttektaraðili skv. 6. gr. laga um reynslusveitarfélög mun einnig fylgjast með framkvæmd tilraunar og meta í lok tilraunatímabils hvernig til hefur tekist.

Ofangreind samþykkt sem gerð er af bæjarstjórn Reykjanesbæjar skv. 1. mgr. 7. gr. laga um reynslusveitarfélög og felur í sér frávik frá 9. gr. laga nr. 18/1985 um vinnumiðlun og 18. og 20. gr. laga nr. 93/1993 um atvinnuleysistryggingar, staðfestist hér með samkvæmt heimild í 2. mgr. 7., sbr. og 12. gr. laga nr. 82/1994 um reynslusveitarfélög, til þess að öðlast gildi frá 1. janúar 1997 og til og með 31. desember 1999.

Félagsmálaráðuneytinu, 17. desember 1996.

Páll Pétursson.

REGLUGERÐ**um ábyrgðargjald atvinnurekenda.**

1. gr.

Ábyrgðargjald atvinnurekenda í ábyrgðasjóð launa vegna gjaldþrota skal árið 1997 vera 0,08% af gjaldstofni sbr. 6. gr. laga um tryggingagjald nr. 113/1990, með síðari breytingum.

2. gr.

Reglugerð þessi, sem sett er samkvæmt 2. mgr. 3. gr. laga um ábyrgðasjóð launa vegna gjaldþrota nr. 53/1993, öðlast þegar gildi.

Félagsmálaráðuneytinu, 16. desember 1996.

Páll Pétursson.

Húnbogi Þorsteinsson.